

Christian Meivah

May - June, 2020

Lhani seh thuso

Private Circulation



Ipi dia Jesu natahsan

Ima khat hi adih ahi, tia na lah tengleh hichu natahsan jitai. Jesu in ahin pohlut tahsan hi adih ahi, tia nagel masanga Bible thudih ahi, ti nanop masat angai-e. Bible in mi hem hi gancha, gamsa, chule ganhing tobang ahipoi ati. Leiset a hou abang bangin, amaho pathen ah apha leh ase aume, tin atahsan ui. Christian ten Pathen a apha aume, Pathen ah ase aumpoi, tin aki tahsane.

Ahile ase kiti hi hoi-a kon ham? Tahbeh a seidin, ase hi Pathen a kon ahipoi. Pathen thilgon susea pang joh ahi (Gen.3). Eiho christian te hi ase'n ijouva ahile Pathen toh iki gamlat un, chule mihem to jong ngailutna akinei ji tapoi. Ase ijonomia ahile Pathen toh kinai ding ahi. Ase chu eihon chonset tin jong iheuve. Mihem hi chonsetna in alungthim alo tengle Pathen toh akijom mat jita poi. Rome lekha bun mihem jouse chon se ahi, ati (Rom.3:10).

Jesun mihem leh Pathen ki kah matna thei agui chu ahin sem kit ahi (2 Cor.5: 19). Mihem jouse lungthima Pathen lhangaina aumin, hichu Pathen bouvin lungthima a-onglai chu ahuhbit thei ahi. A-ong

lai huhna thei din, mi abang in gou aki kholin, mi abangin sum akholin, mi abangin kinop sahna hinkho amang in, chule abangin ju adone. Ahinla hiho chu phat chomcha khat dia bou ahin, aphant jousen a-onglai chu ahubit joupon, mihem chun chamna, lungmonna, lhamonna anei jipoi. Hiche a-onglai hi Pathenin ahuh tengle bou mihem chu alungna achim jin ahi. Mi kichih sahtah Sir William Ramsay, archeologist pa chun, Bible a 'Solchah ho natoh' (Acts) hi adihpoi, tin adinpin, adih loudan seichetna din, Bible hi simme tin anasim in ahile Jesu tahsan lama hattah pa khat ahung hidoh in ahi.

Jesu hi athi loi sangin ana hing sot jep leh anatoh atam toh doh jep lou ding ham? Athi chu ahin kit vetsahna ding ahi. Ana thipai pai hen, hing kit hih taleh christian hou hileh houdang kikkehna umlou ding, mihon Jesu atahsan sang uva hou danga lamkai thisa jong atahsan lo diu anahi. Bible in, "Koi hile Christa toh hingkhom chu thilsem thah soh ahitan, abula kisem masa chengse kitolmang ahitai, ven thil thah asoh tai" ati (2 Cor.5:17). Mi khat in Jesu ahin tahsan tengleh mithah ahiji tai. Ama chu pengkit (peng thah) ahi

2
tai. Hichu Lhagaova peng jong akiti. Lhagao lama pengkit lou ho jouse chu christian kiti jong leu, 'christian tah tah' chu hilou lai, thi jongleh van gam lut lou ding ho ahi (John 3:3). Mi apengkit (apeng tahsa) khat in chonset bolkit taponte, tia sei ahah sai. Apen kit chu phatea anit jing loule van gam mulou ding christian khat hung hithehi ahi. Jesu tahsan jinga, tahsanna dailhah sah lou ding ahi.

Bible a Lhagaova peng mi phabep imuve. Kai dongpa mihao pa, Zaccheus chun Jesu ahin tah sanin mithah ahung hi (Lk. 19: 1-10), hou lamkai Nicodemus in jong Jesu akisane (John 3), chonsenu Samaria nun Jesu ahin tahsane (Jn. 4), mit thoppa (John 9), Jesu seijui 12 ho, Jesu kisan mi 3,000 (Acts 2), Ethiopia a sappa (Acts 8), Saul, Tarsus a cheng Saul (Acts 9), Cornelius (Acts 10), Philippi-a songkul vetuppa (16), Rome a cheng mi tampi (Rom. 1), milim hou, gucha, judon, chonse ho (1 Cor. 6) chule ajam mang dia kigo Onesimus (Philemon lekhabua) ho ahivu.

Jesu tahsan ho hinkho vang chombekh ahi. Hinkho chombekh manglou christian chu, atah tah hi lou lai ahi. Jesu dihtah a tahsan ho phatthei boh achang jingui. Pathenin lamchom choma konin vang bohna ape jinge. Anu apa Jesu tahsan dih tah hiho chate, Pathenin ichan ham khat in phatthei aboh jingin ahi. Jesu tahsan hi moh ahipoi.

Nakigin jou tah em

- Billy Graham -

Nitin thusoh ho akisim jileh amun amuna miho gentheina akija doh jie. Hitobang genthei hahsatna hohi vannoi a hung um dia Bible in asutsa ahi. Jesu amatah in jong aseisa ahi. Vannoi leiset phat abei kon leh, Noah nikhoa hahsatna tobang umdia aseisa ahi (Mt.24:37). Noah henga Pathenin konglen tah khat semin lang, hia chun jule va ganhing namkim akop kop in khumin anati (Gen.6:14-21).

Noah in kum 100 vel kong len chu anasem lai in, avela amute hon, hibanga nisat hoi lai-a ipi go jong juta ding ham, tin tot nopnan ana nei-e. Ahinla Noah chun mihem sangin Pathen ana tahsan joi. Noah in kiging un twisang let um ding ahi atiji vangin, mihem ten atahsan hih uve. Kong asem joutan, go ahung jupan tai. Twi ahung len jep jep tai. Kong sunga kikhum Noah insungte leh jule va, sa, asunga akhumse tilou adangse mihemte hijongle abonun twisang let chun achup un, athi gam hel tauve.

Hiti hin, kum 6000 masang in vannoi leiset a cheng michonse ho chu Pathenin asumang hel jenge. Pathen alunghan leh adou thei ding aumpoi. Asemsa chungu tha anei-e ti iheuve. Hiche jou chun, Pathen in vannoi mihemte hi twi in sumang kit taponge, abanin vang mei-in sumang inge, tin ana sei tai (2 Pet.3:7). Tulai mihemte hi Pathen deilou lama kipe

ahung tamlleh kit tai. Ase deilou Pathenin itih chan leiset mihemte hi ave nalai dem ! Leiset kichaina ding nagel leh nalung khamlou ham ? Pa Pathenin eingah sot tapouvinte ti hetsahna akisun tai (Gen.6:3). Achu ti leh nangma nahin, na-insungte ahin kisutup loi un, phat alhom tai.

Noah chu Pathen tahsan mi ahin, Pathenin alungset in ahoidoh na ding lampi anahile. Pathen in ahil na bangin, konglen adung foot 450, avai foot 75, chule asan dan foot 45 anasem tan ahi (Gen.6:13-16). Go chu ni 40 leh jan 40 anajui. Hi jong chu akong semjou ni sagi jouva kona hungju anahi. Pathen in ni sagi kiging masauvin, tia ana hetsah ahi. Pathenin kong nasem chai chai leh lutpan jengun, atipoi. Ni sagi kiging tadiuvin, hiche joule bou go kajuh sah ding ahi, ati nalai-e. Pathenin ama tahsante din phat ape jinge (2 Pet.3:9).

Alutsah nomse se kong a chu alut jouvin Pathenin kong kot chu ahin khah nalai-e. Noah koma nalutjou tengule kot chu khah un, atipoi. Pathenin kot akha chu det chet ahi. Gotui lutlou ahi. Pathen milungset dan hi imuve. Ama thu ngaite, ama tahsante akhum tup chah kheh ahi. Idia Pathen isonlel diu ham ! Pathenin van kot ahon pet hin, athu ngai utin, kot sunga lut tei na din kigong taute. Pathenin vankot ahinkha vah ding ahitai. Phat anai tai. Vannoi thilsoh hon, leiset beivah na ding thuho eihil jingui.

Jesu tahsan hi sochatna

Rom. 11:11-36 sunga sol chah Paul thusei hi het din abailam poi. Athusei hi thuma akihop khen leh aheth abailam jep-e. (i) Chitin namtin sochatna dia Israel kinganse, (ii) Israel ten sochatna akibol thei lounau ajeh, (iii) Jesu tahsan jala mihem sohcha ding ahi.

1. *Israel kingansena* : Namtin sochat theina dia Pathenin Israel ananganse ahi. Achonset jeh a mihem in athilo jina ding chu, Pathenin danthu asema (Law), ajuikim ho sohcha tei dia agona, hiche kin tong doh dia chu, Pathenin Israel ananganse ahi. Ahinla Israel ten hiche Danthu chu ajui kim jou pouvin, chule chidang namdang amahon Pathen henga dia alahlut ho jong chun, hiche Danthu chu ajui kim jou tapouvin ahi. Mihema peng tapou in Danthu hi ajuikim jou tapon, tah saphe mihem jui joulou chule apanpi aum lou leh ajuijou louhel din, aum doh tan ahi.

2. *Israel ten abol thei lou* : Israel te jong chu mihem tahsaphe nei ahivun, hijeh chun Pathenin apeh Danthu chu ajuikim jou tapouve. Ajo chana jui jou agot vangun, alhasam aum kei tai. Hijeh chun sochatna kin hi akinganse vangun abol doh jou tapouve. Israel te chun juikim uhen lang chule namdang mi Israel jop ho juisah agot-u hileh dih ding ahin, amaho hihen mihem koi hileh ajui lel soh hel tauvin ahi.

Pathen Danthu juikim lou jeh a Israel ten avel vela genthei ahin thoh-u ahin, akhonna kei-a vannoi kol kimvela changvai banga hung kithe thang sohheh ahivue.

3. *Jesu tahsan sochatna* : Jesu hi mi chonsete huhhinga, thinaa kona sochat sah dinga Pathen gon sa ahi. Thinaa kona sochatna ding thilgon dang aumpoi (Gen. 3:15, Mt.1:21, Acts 4:12). Israel ten akhang khanga ajuikim jou lou danthu peh chu, Pakai Jesun ajui kim soh helin, chonsete thi ding khelin, chonse louhel pa athin, chonset bol lou, chonse lou, ahijeh chun thinan Jesu ajou tapon, thinan alael tan, lhana konin athou doh in ahing tai.

Israelte Pakai Jesu tahsan jouse huhhinga um diu, thinaa kona sohcha ding ahivue. Ahinla Israel ten Pakai Jesu atahsan lou jeh a huhhingna alhasou chu, Pakai Jesu tahsana chidang namdang ten, hoi thopi louhel ding ahi. Achuti louleh Damun kigei ding ahitai. Israel te lheng-a Danthu pepa Pathen ahin, chule Israel nam mangchaa mitin hilna nei hi Pathen ahi.

Israel hihen, namdang hile Pathen thilgon dung jui-a, Jesu tahsan chan, socha dinga hinbola jong Pathen ma ahi. Koi hileh thinaa kona sochatna boldoh thei aumpoi. Pakai Jesu tahsan jala bou sochat na kimu thei ahi. Hiche hi phaten tahsan ute.

- Dr. T. Lunkim -

Pentecost nikho

May 31, ni hi Pentecost Sunday ahitai. Solchahte (Acts) bung nia, Peter in Christa Missionary hinaa athusei amasapen ananei in ahi. Ama thusei ngaiho chu seijui somle khat ho, christian thah ho, ipi thu hitam tia hung kikhom ho, atahsan loulai ho, chule Jesu thu them khat jakhaho anahivue. Peter in aseithupi pen chu Jesu thisa thodoh kit chule ama eiho huhhingpu ahidan chu ahi (Acts 2: 14-42).

Lhagao Theng in akithopia kicha louhel a Jesu thu ngampela aseithu anahi. Athu seipet chun achang in ana dingpon, akoma seijui 11 ho jong chu anadinge. Angai ho chun athusei chu lunglut tah in anangai uvin ahi. Athu patna a chun, "Vo, Judah miho le Jerusalem chengte, nabon chauvin hiche hi heuvin lang kasei chengse hi lung nachang in ngai-un, tin ana sei pane (Acts 2: 14).

Luke 24:13-35 sunga Jesu pasal ni koma akilah thu aume. Ama ni hi, Jesu akimat a, akithaa, chule ahindoh kit ding thu ho kihoulim puma, Emmaus jona lampia kihou hidin tahsan aume. Hiche kho hi Jerusalem a kona gamla behseh lou ahi. Jesu athodoh jouvin amani hitoh anache khome. Amani kijot nihi Jesu thi jou nithum nikho anahitai. Peter in Pentecost nia mipi henga thu a sei, Pathen Lhagao in akithopi in angai ho lungsung anakhoi tan ahi.

Peter in mipi lah a aseï thu hi lam thuma hop thei ahi. *Khatna*, itobang thil khat soh a hitam, ti chu aseï in (Acts 2:14-21). *Ninaa*, ipi dia hichu soh ham, ti ahi (Acts 2:22-28). Chule *thumnaa*, akisei ma sa ho suhbulhitnaa soh ahi, tihi ahi (Acts 2:29-36). Hicheng thumhi tun chomchan donbut taute. Lhagao Thenga kona hiche thil kidang chu soh a ahin, hiche Lhagao Theng chu Jesu a kona hunga ahin, chule athum naa, hiche Lhagao Theng chu Jesun Pathen toh kihou toh a ama tah chu Pakai le Christa ahi jeh a ahin sol thei ahi. Ahileh John 20:22 a, Jesun “Amaho ahu alha khumin ajah uva, ‘Lhagao kisan un’ tin seijui ho koma ana sei-e.

Ahinla Pentecost nikhoa Lhagao Theng seijui teho chung a ahung chuh jou chun seijui hon kicha louhel leh, hangsan tah in Jesu thu ana seiphong jou tauve. Hiche teni kikhehna chu ahile Pentecost nikho jouva chu Jesu tahsan ho chu seijui ten Lhagao Theng aphon thei ahi tai.

Seijui hon Jesu kimat, aki tha, athodoh kit amit tah a amuu ahi. Ahinla Jesun amaho koma Lhagao Theng ahung ni ding ngah nalai un, thodoh hina chu lhing jou loulai ahi, tia ahetsah ahi. Mit a kimu hi lhingjep loulai ji ahi. Sunga lut kiti hi bulhinna ahi. Jesu katahsane, ti mai mai sanga Jesu ken kanei-e, tichu lhingjo ahi. Jesu neihon thu aseï teng jat chom jepji ahi.

Pathen manchah miho

Pathen manchah miho chu *hinna gim namtui* ahiuve. Solchah Paul in, “Ahing din jong gim nam tui kanam uve” ati (2 Cor.2:16). Gu lap (Rose) pahcha khu anam atui in, aju jong aumin, khoiva ten aju akichop chop un khoiju tamtah tah asemun, mihem ten jong aju akine jie. Pengpalep ten jong aju akichop ji jiuvin, ahivang in vantham jola ajunin athalha ji tauve. Pahcha banga hi christian nangin mi chopthei ju nanei hinam, nanam tui-a hinam, ole thina gimnam nahi joh ham ?

Chapang khat in bulhang akidop a, avale teng leh amua ahcha hon aju un, bumal lhajah chu akilo uvin, hinnan anei jiuve. Hiche banga chu nangin jong hinna an nakidop a navale ji hinam ? Nathu sei-a kona min hinna an akilo hinam ? Vohpi thaigop khat chu avale teng anouten aju demdum jie. Vohchal pa vang vohnou ten, ahoilheh vangin, aju jipoi. Ajeh chu aman noitui aneipoi. Ahile sopi, nangma vohpi nahi ham, vohchal hoitah nahi joh ham ?

Hiche banga chu nangman Lhagao noitui nanei louleh namel hoi leh hen, jolsel jingle chun koiman juipon nate. Vohchal pa chu ahoi manin anouten aju naisai pouve. Ahpi chu ahoimo vangin, anoute alhaving noi-a lungmong in akisel jiuve. Ahchal chu ahoi tah hijongle ahnou ten akicha bouve.

Ahileh nang hi jong min nakichat ji hitam ? Ahiloule nangai ji hinam ? Bible hi hinna lekhabu ahi ti ihe soh kei ui. Hou lamkai khat hinan na Bible nachena chana nakichoi le le jie. Mi ijat nahuhhinga hitam ? Mi khat beh nahuhhing loule sumbom akeusa kichoi lele tobang bep nahi. Miho vet din, na Bible chu hinna lekhabu hilouva, thusim bu tobang bep ahitai.

Mihem khat chu Pathenin ahin manchah tengleh mi jousen amang nomin, akou ding mi akichu jiuvin, dung kou vaikou atho jiuve. Ama chu limbol ding, pon peding akichu thouvun, imacha it ding anei pouve. Pathenin amanchah lou mi vang chu, itobang thepna nei hijong le koima chan akou nom jipoi. Mi hon amanchah nom lou lamkai chun Pathen manchah kahipoi, ti kihet mai hen. Pathenin aman chah lou mi chu, min jong akou jipoi. Hijeh chun min nakou theina din kipe doh in, ajole koulou sakhom hikhan nate.

Pathen manchah miho chu athusimu amang jipoi. Missionary masaho, William Carey, Mother Theresa, William Pettigrew, Billy Graham, Sadhu Sundar Singh teho tulai min athusimu angainom un asim sim jinge. Athinung un jong athusim amang tapoi. Bible in, navah uchu miho anga kilang hen, ati. Jesun, nangho gaso dia kapansah nahiuve ati (Jn.15:16). Kache ding ham, khut goh keuva, kiti la chu gaso lou ten gel utin, hatoh in tongute.

Pathen manchah miho atou thim nom poi. Thusei lasah lama athau anomin, kham jou ahipoi. Peter in, keihon kamu kahet uchu seilou thei kahi pouve, anati. Hijeh chun Pathenin ama chu amanchah jeh in mithi jong anakai thouve. Van le leiset hinsempa, nile lha hinsempa, aloupi dan het-a hetphah hiloupa, manchah thei mi khat hiding chu iti kidana hitam ? Miching, mithem, abol thei hijat lah a, Pathen manchah thei mi khat hi chu iti gil hitam ?

Lengpa David chu Pathen thingkong mai-a lengvon asut lhan, analam lam jengin ahi. Lathah Bua, “Aw iti gil tam, nalung thim iti san tam, nalungsetna lhatheng lei-a leng ongeite le van pao in, seijou thei lou” atin ahi. Mi khat chun ama Pathen in amanchah akihet doh loule idia lam lam jeng ding ham ? Akipah lou chu lamji em ? Min nao akipoh a alam lam leh ahoi jep in, naopo louvin kilam lam leh min angol eihi sah ding ahi. Min Pathen lhagao apoh a, kiphah a lam lamji ahi. Ahina pumpi le atha neina pumpia Pathen avahchoi ji ahi.

Pathenin amanchah ho chu thahat thilbol theina apen, thilha anodoh un, ana adamsah un, akipah lou jong akipa sah jin ahi (Acts 1:8-9, Mk. 16:17). Solchah Paul in, eihatsah pa Christa vanga ijakai jou thei kahi, ati. Thuso sim jouse Pathen manchah thei ahi chehna din, Pathenin umpi jing tauvin, Amen.

(Late Rev. Seikholen Lenthang)

Nu geldohna nikho

2020 a May 10 nikho hi Nu Nikho (Mother's Day) ahung hitan, anu hing nalai ten nanu cheh-u geldoh un lang, taopeh uvin. Nuten insung akhohsah dan leh insung asuh mil louna akidange. Nuten achate angai lut jong hi kidang val ahi. Acha khat tou adammo leh jan khovah a toupingam ahi. Tuchunga ni 54 jen Lock Down kibol lai-a achapa vaitham den, anun km. 1600 scooter atola agapui, alungset jeh ahi.

Chaten hiche nikhole nanu-u kipana din ponve ahiloule sang khol chohpeh un, nu akipaa ahile phatthei boh kichang ahi. Nanuvin itihle nadallah diu nahe pouvin, ahin pet a nakipa sah diu nakinu ahi.

Pa geldohna nikho

Tukum 2020 a din June 21 nihi Pa geldohna nikho (Father's Day) ahi. Pa umlou hile cha (nang) jong umlou ding nahi. Hijeh chun chaten paa konin bat tamtah anei ui. Jesu tilou adang se pa bei-a peng akija khapoi. Hiche nile hin pa neina lai ten, ipa cheh ikipa sah-u angai in chule itao peh-u angai-e. Ichunga alung lhaina thei thilpeh nei-a chule hiche nia hi ajahda ding jong sei lou hel ding ahi.

Mipa khat in ajinu le achate avah, agena diu in apeh, insung vah na ding chate lekha simna dia asum lo ho aphal ngam kidang ahi. Mipa insung semnomte pachat umtah ahi.

Seijui dihtah koiham

“Jesun miho jah a, keima eijui nom chu ama kingai toma, ni seh a, thingpel kiput a, eijui ding ahi” ati. Jesu seijui hinom jousen hiche hi suhmil lou ding ahi. Gospel lihon hiche hi asut-u ahi. Mat. le Luke a hiche thu hi nivei vei akisei doh-e. Achutileh hiche hi bollou phamo chu ahi, tia ilah diu ahi. Jesu nung jui din mi tampi ahungin, dihtah a ama jui vang lhom cha ahi. Jesu nung jui kiti hi hahsatna puma hinkho man tina ahi.

Jesu mina genthei hahsatna toding khoh salou ho leh achonset lungthim pailha nom hon bou ajui lhum jouve. Leiset thil ngailutna beihela Jesu nung thengsela jui ho chonsetna Jesun angaidam jitai.

1. *Kisuh milna* : Kingaitomna, ima hilouva kigelna chu ahi. Akithi teng le tahsa hi ima ahitapoi. Hijeh a hi eima ding, inopsahna ding, ihao na ding, khohsah chu panna bei ahin, kisuh mila Jesu bou geldoh a khoh sah chu phachom ahi. Jesu nung juinom chan chu ama ima lou in kigel hen, ati ahi. Jesu in munnom van gam ahin dalhah a michonse ho lah a hinkho ahung man ahi (Mt. 11: 19).

Jesun vana vantil ten ajenle na mun, jingkah nilhah a ahou nau mun van gam chu ahin dalhah-a. mihemte chotpha le bol set ahung kilhen ahi (Mt. 27: 39-44).

Leiset a satan le mihemte toh kikat tona dia vana um asepaite koulhah ding jong agot lou anahi (Mt. 26:53-54). Missionary masa ho hinkho Jesu dia kiphal ngampel ho chule Paul hinkho hoa, ‘kei-a’ (self) kiti hi ana beihel in ahi. Hijeh chun aminu thusim buhoa achong jinge. Idia Billy Graham khel thei umlou hitam, idia Mother Theresa khel thei um talou ham, gelkham set ahi. Bible a chapang pa khat in ama buchun Jesu ana pehdoh jeng chu, tulai a Jesu kangailui tihon abol ngam lou mai thei ahi (Jn.6).

2. *Cross kiput* : Cross kiput hin, kichang ngailutna anuse louva ahile, christian hinkho dihchet hilou ahi. Tulai christian tamtah in, cross aki put poi. Nopsahna ding leh sum muna dia lamkai hia atame. Kingai tom kiti jonghi akama aphondoh a, amihinaa phongdoh joulou atam tai. Vannoi leiset nei-a, ama lhagao ki mansah mi chu hinlo bei ahi (Mk. 8: 36-37). Cross chu jachatpi umtah leh thoh gentheina chu ahi. Mi noise bolna leh engbolna ho kiseina ahi. Cross kiput lou christian chu satan a ahi (Mt. 16:13-24).

Jesu mi ahijeh a kithat doh ho (Martyrs), tot nopnaa kinei ho, engbola umho chu cross kiput ho ahivu. Cross hi agih-e. Cross ajang dom kiput ding aumpoi. Jesun jong Calvary mol chung lam jonin cross gihatah chu anapui. Cross hi abai poi. Christian bailoi hinom chan chu ahin kho lampi bing ding ahi.

Vannoi in christian te adou jinge (Jn.15:18-25). Bol gentheina ho peldoh nom christian chun ajou aseiji ding angai-e. Amaho chun tahsa hinkho kihuh doh nantin, alha gao hinkho vang ahuhhing joulou ahi (9:24). New Testament a cross kiti hi Mt. 10:38 hi ahi. Nang man Jesu natahsan mong monga ahile nahah satna, nathohlelna ding jousea aman nahin kithopi ding ahi.

Cross kiput kiti hi kahvah vah leh put ding thu ahipon, phat tinna kiput jing ding ahi. Min angong a Jesu cross khat aki-o jing tobang chu ahi. Cross hi kiput jing ding tina ahi. Idei phat le put a, thildanga ikisahlel nom tengleh put da tahdi ding tina ahipoi. Jesu in “Niseh a thingpel kiput a eijui ding ahi” anati. Niseh a kiti hin ‘phat tinna’ atina ahi. Heb. 12:3-4 in, “Nahin khouva na lhah dah uva nalel louna diuvin, chon se ten ama dounaa thuse chujatpi aseiu dou lhumkei pa chu, geldoh jingun. Chonset louna lama nangho, thisan long leuvin napang hih lai uve” tin akisune.

Christa hinkho chu cross a akichai poi. Athoh dingse athoh jou phat in, loupina le jabolna lal lukhuh Jesu anachange. Jesu tah sante hin kho jong cross niseh a akiput-a ki chai ding ahipoi. Van gam a lallu khuh in galjo hetsahnaa anga jing ahi. “Ken kangai nai hiche cross lui chu, ka leiset hinkho kalha kah sen, ... nikhat le lallukhuh toh kalhet ding.”

Thisan in chonset asop

Old Testament a chonset suh thengna dia Bongchal le kelchal thisan aman-u ahi. Bongchal le kelchal thisan a chonset suh thengna bola chu thempu ho ahiuve (Levi. 16:20-34, Heb.9:1-22). New Testament a chonset sopthengnaa kimang chu, Jesu Christa thisan ahin chule chonset sopthengna kin bola pang thempu chu Jesu Christa ahi.

1. *O.T.* : Old Testament a thempu kin chu chonset suhtheng ahi. Chonset suhtheng na dia thempu ho man chah chu bongchal le kelchal thisan ahi. *O.T.* a chonset suh thengna kin bol chu, thempu ho ahin, mipi chonsetna leh ama chonset (thempu) suh thengna dinga bongchal le kelchal thisan athe khumu ahi. Gancha thisan choi-a thempu chu, kum khat sunga khatvei bou muntheng chungnung kitia galutjia, avel vela kum seh-a abolji ahi.

2. *Pakai Jesu* : thempu len thisana chonset kisoptheng ahitai. *O.T.* a chonset suhthengna kibola chun thil thum alut-e. (i) thempu, (ii) thisan, chule (iii) muntheng chungnung, ahi. Abon chauva hi kihilna dinga lim vet sahna, chonset suhthengna tahbeh akibol tengle het theina dia anabolu ahi.

New Testament a atah beh a, chonset sop thengna bol ding pa chu Jesu Christa ahin, chonset bol mihem thisan boh kheldohna dinga

Pakai Jesu, mihem chapa thisan theng chu pang ahi. Mihem chonse thisan bohsa kheldohna dinga mi hem chapaa hunga, Jesu Christa khatvei seh van mun thenga lut a, thisan bohsa sopthengna kin abol ahitai (Heb. 9:11-12).

3. *Heb.9:15-22* : Old Testament a kitepna kibol jouse namdetnaa thisan ana kimang cheh ahi. Jesu Christa'n, "Hiche hi mi tamtah dinga kilhoh lha ka thisana kitepna ahi" (Mk. 14:24) ti hi Paul in, "Hiche hi ka thisana kitepna thah ahi" tia 'atah' a asehi ahi (1 Cor.11:25).

Jesu tahsaphea ahin pet-a, jan ankong phunga lengpi twi athisan ahisah chu, athia chu amolso ahitai. Thinaa kona ahindoh chun, chonset jouse apohmang ahitai. Old Testament Leviticus 16:21 a, chonset pomang kelcha hing kilha chu gui lhunga ahitai. Hiche kalse hi kum seh a bongchal leh kelchal kithat talou, chule muntheng chungna jong kum khat a thempu khat vei bou lut talou ahin, Pakai Jesu khatvei athia athisan longlha chun ima jouse abolchai ahi tai.

Dammo louna dia

Tillai chun ima jouse atheng in, tulai hin ima jouse atheng tapoi. Atheng akineh loule akidam poi. Hi jeh chun neh le chah atheng kilhen angai-e. Ichih thei lou jeh a idammo teng damdoi choh kit hi nivei leuna a gel apha. Ima khat atheng lou dia nagingmo le neda jengin, aphajoi.

Nui-hi, damna (Prov.17:22)

* Africa sunga Burundi gam mite Health Minister pa henga, idia nang ho gambou hi Covid-19 na mi khat cha ana, umlouva gam dangsea ana umsoh kei-a ham, tia adoh ule aman adonbutna chu, abai a bai ahi ajeh chu kei ho gama *testing kids* aum hih lai-e, anati.

* Nungah chingtah khat koite ham khat chapa toh ana kicheng tai. Hiche nilhah chun insunga anacheng ho toh atoukhom in, chule ading doh in hitin anasei-e, "Sopite, kanile ka gangte nangho ingsunga kahung lut kakipah behseh-e. Imacha lung ling laona neihun, kichatna jong neihun, ajeh chu keiman nangho koma ima kakhel nom ding aumpoi. Lung mong selin natoh ngai ngai-u, kitoh cheh uvin,

Von sop hon sop jingun, an honten hon jingun, sumlo ten lo jingun, in sutheng ten sutheng jingun, ken ima seiponge. Kei bol ding chu ahile kajipa lungmon sah leh kipa sah ding bou chu kakin ahi" anati.

* Ojapun class a, 'West Indies a ipi kimu pen ham' atile chapang khat in, "Ojapu, ken kahe poi" ahinti. Chuin ojapun, 'Ahileh chini kang nanah jiu hi hoi-a kona namuu ham' atileh, hiche chapang pa chun, "Kei ho neh chu kanun inkengte ina kona ahinchoi ahi" atile ojapun aban seiding aheta poi.

* Kum 2010 chun, ajipan Car khat lakh li apen achoi chule hiche kum

chun ajinun sana khiba lakh li man ana kichoh-e. Tukum sum ahah tah jeh hin, ajoh cheh lhonin ahileh jipa gari chu min lakh khat val apenom tapon, chule jinu sana khimu vang chu min lakh 16 apenom ui. Hiche jeh hin jipa ten jinu dia thil nachoh peh tengule ahoi hoi, apha pha choh pehji tauvin, kisah pouvin nate.

* *British pa le India pa kihouna* : *British* - Twi najap thei em ?

India - Kajap theipoi.

British - Ahile nang sang in uicha khat apha chomjoi, ajeh chu uichan twi ajap thei-e.

India - Nangin twi najap thei em ?

British - Kajap thei-e.

India - Hilai tah a chu, nang le uicha thakhat nahi lhonna kihe ahi.

British - pa chun, hichu ajan, athi mil doh tai, India pa vang chu anui nui tai.

* Saturday chu kintah in Sunday te ina alhai jel in, Monday amaho koma um em, thu khat kadoh nom jeh ahi, ati. Ajeh chu Tuesday aholdoh jou lou phat a, Wednesday in Thursday henga tukum 2020 a Friday nia hou-in kikhah ding chule Good Friday umlou ding ahi tia asehi khah em ti adoh nom ahi.

* Jail a umpa hi, court a athu tan din ahin dinsah tauve. Aman Judge pa henga, "Hepu, keihi mona bei kahi. Airport a kanaopan eihung lah kagalmaua, kasap le eikiman ahi" ati. Judge pan, "Iti nasap ham" atileh aman, "Hi, Jack. Hi, Jack (hijack) kati ahi" anati.

Het-a phachom ho

* Jiribam lang a kona Imphal phah na ding rail lei asaan-a sang khat adopan tauve. Hiche hi March, 2022 sunga chai ding atiuvin, hiche lei saodan hi Meter 555 hiding ahi. Assam a kona Imphal lhung ding rail lampia hi lei 148 do angai-e. Chule mol kivut ding 47 (tunnel) aumin, Broad Gauge ahi.

* Tuchung natna kichat umtah pa, Corona Virus (Covid-19) hi tema kichai ding nat ahitapoi. Laangse jing ding natna ahi. Hijeh chun adam tai kiti ho le, nat aveipoi kiti ho jong kichat din aum tan, kichih thei angai tai. Apatna ding lou mong aumpo lai in, mi athi jinge. Doctor hon adon jen jen nahlai ahi. Alou ahinsem doh jongule Malaria, Cholera, T.B. kiti ho banga ilah uva umjing tante.

Mihemin mihem apeh son ahin, thih chung leh plastic chung virus hi aumleh pung 14 vel ahingin, akot lah a vang pung 6 ahing nalai-ue, atiuve. Me, anche ima nachoh teng plastic sakhaova nahin khaileh in nalhun lhunin plastic chu napai loi ham ahiloule mei-a nahal lhah ham bolin. Mi khat to natou khom, na kihou khom teng meter khat le akeh beh kigam lat in. Mi adam selsul banga kimu jong chu nat posa, nat hom jing hithei ahi, akiti. Noise pou te. Inpoa pot pou pouvin muh kitom ding ahi. Adamlou khat in ikhut khum, ichit khum, iti chung a achil phon beh thei ahi. Mito jong ki vop vop louvin apha.

* Apple, Cherry kitiho amu hi neh lou ding ahi. Amua Cyanide kiti thi na thei gu aume, atiuve. Changkha mu vang hi atahsa bangin, damna aumin hijeh chun nehtha thei ahi. Changkha (Karela) hi Diabetes nat neiten aneh jingule aphachome. Ayurvedi pharmacy a changkha tui jong akijoh-e.

* Kichen kiti hi lungput chom chom ni chengkhom ahin, nupa chu kito na dinga akihou toh ji angai-e. Pasal ho kithunei sahji ahiuve. Adeh in Pathen helou ho vang akidem hih un, numei thalthom jep ahijeh in athilo aum jinge. Ajinun aphatchaa an athuh peh lou jeh a ajinu that thu jong thusoa akimui.

* Chini kang (sugar) ahiloule alhum kiti pou pouhi idu nauvin, ahinla ki ngol leh ahiloule ahitheina chanin kineda jile vang pha ahi. Ahimo beh seh hon themcha bou nele dei ahi. Chini a kona Heart Disease, Cancer, Dementia, Diabetes, Acne, Infertility, Yeast infection, Impotence, Depression ho akone, akiti.

* Scientist hon aphon doh uchu, vana ahsi hohi akom uva Red Dwarf kiti ahsi khat toh akilhon tengule Red Dwarf chun ama gravitational pull chun ahsi chu ahin jop in, mihem mit lhimal bangin hiche ahsi chu ajom doh jin ahi, atiuve.

Hiche hi ahsi jouse chung a aphaat phat le asoh jin, ahsi hi leiset a kona gamla tah ahin, mihem mit in ajom teng amu theipoi, atiuve.

Christian Meivah - sim te taona akiman peh jinge. Sumto kuma Rs. 100/- ahin, asim nom hon hin peuvin, sum napeh lhaa kona kum nakisim peh ahi. M.O. hin thot hon Editor kipe ding lekha beh a namin le address suntei un. Editor pu Mobile No.94355-51080 ah hin hetsah un. Manipur le Naga land a sumto peh na thei ho :-

- 1) Mrs. Haokip, Haokip Veng
- 2) Ms. Nemhoichong Haokip, KBC
- 3) Mr. J. Manchong (Lunpu), KCC
- 4) Rev. Lhoukholal, Kangpokpi Missn
- 5) Mrs. Veikholam, Ideal school, ccpur.
- 6) Mr. Henkai Lenthang, Medziphema,
- 7) Mr. Seikholun Singsit, Kohima.
- 8) Mrs. Lhingjahat Hengna, Dimapur.
- 9) Mr. Hegin Lhungdim, Mizoram

Het-a phachom ho

* India national flag design sempa min hi Pingali Ventayya ahi ... India te Rashtrapati Bhavan design bolpa hi, Edward Lutyens leh Herbert Baker amani ahi ... IPL player lah a mi mantam pen, sum kitam pehpen chu, Pat Cummins ahi ... America te national game hi, Baseball ahi.

* *Christian Meivah thuso lahna man Bank a hinthot nom hon hia hinthot un, chule minho le nasum thot jat chu Editor pa henga SMS or phone in hin hetsah tauvin :*

M. Haokhothong, Bank of India, Branch - Khanapara, Guwahati. S/B/A/c. No. 500910110000191 IFSC Code BKID 0005009

Christian Meivah
May - June, 2020

PRINTED MATTER

To :

Editor :
Rev. M. Haokhothong,
C/o, T. Manchong
Nichols Hr. Secondary School, Satbari, K.C. Road,
P. O. Rehbari -781008, Guwahati, Assam.